



ВЫЛЬ СІЗЕН



ОТДЕЛ
РЕЛИГИОЗНОГО
ОБРАЗОВАНИЯ

ПЕТР АПОСТОЛЛЭН ЫСТЭМ НЫРЫСЕТІ ГОЖТЭТЭЗ

1-тй ЛЮКЕТ

¹Петр, Иисус Христослэн апостолэз, Инмарен бырьемъёслы, мурт шаерын, – Понтын, Галатияын, Каппадокияын, Асияын, Вифинияын – пазьгиськыса улйсьёслы. ²Инмар Атайлэн мылкыд каремезъя, Дух пыр дун-сьöлыктэм карыса тй бырьемын Иисус Христослэсь кылзйськон но Солэн Вирыныз сузяськон понна. Дэлет тйледлы! Тупаса улонды мед йылоз.

³Инмар, Кузё-Инмармылэн Иисус Христослэн Атаез данлыко! Аслаз быдзым зечлыкеныз, Иисус Христослэн кулэмысь улзыса султонэз пыр, асьмеды выльысь вордскытйз улэп улонлы оскиськон сётон понна. ⁴Сисьмисьтэм, саптаськисьтэм, шуясьтэм-куасьмисьтэм люкет сётйз, кудйз асьме понна Инмын возиське. ⁵Оскон пыр Инмарлэн кужыменыз шобыртэмъёс, берпуметй нунальёсы усьтйськись утиськонэн утемын луоды. ⁶Та пумысен шумпотэлэ, та виын пöртэм визь сынаськонъёсын сэрен öжытак куректоно ке но луиды. ⁷Эскерем-чаклам осконды тыл пыр эскерем-чаклам ышись-бырись зарнилэсь но дуногес. Иисус Христос лыктыку, ушьян, сй-сан, данлык мед басьтоды. ⁸Иисус Христосэз адзйтэк но яратйськоды, та дырозь Сое тй öд адзе, но Солы оскыса, вераны луонтэм, туж дано шумпотонэн шум-

потйськоды. ⁹Озы, асьтэ осконэн лулдэс утёна
вуйськоды.

¹⁰Та утиськонэз утказы, эскеризы-чаклазы про-
рокъёс. Соос азьвыл ик веразы тйледлы дасям
дэлет сярысь. ¹¹Эскеризы-чаклазы, кудйз вылэ но
кыче дырлы возматылйз соос пушкысь Хрис-
тослэн Духез, куке со азьвыл ик тодытьяз Хрис-
тослэсь курадзонъёссэ но соос бёрсы лыктйсь
Солэн пиштйсь данлыкез сярысь. ¹²Соослы усь-
тэмын вал: соослы асьсэлы өвёл, соос асьмелы
ужало шуыса. Со сярысь тйледлы ивортылйзы
Инмысен лэзем Святой Духен тыр луыса Зеч Ивор
ваисьёс. Кылчинъёслэн но та сярысь туж тодэмзы
потэ.

¹³Соин ик, визьдылэсь куссэ думыса, сэзь улыса,
быдэсак оскиське Иисус Христослэн лыктон дыръ-
яз тйледлы сётиськись дэлет вылэ. ¹⁴Кылзйськись
нылпиос кадесь луэлэ, мугордылэн кулэ каронъ-
ёсызлы кузёяськыны эн сётйське. Соос тй пушкын
уло вал, куке тй утиськон сярысь номыр но уд на
тодйське вал. ¹⁵Тйледыз өтем Дун-Сьöлыктэмлэсь
адзем карыса, тй асьтэос но быдэс улон-вылонады
дун-сьöлыктэмесь луэлэ; ¹⁶Гожтэмын уго: "Дун-
сьöлыктэмесь луэлэ, уго Мон дун-сьöлыктэм".
¹⁷Атай шуыса нимаськоды ке Сое, Кудйз, ымныр
шоры учкытэк, ужъёсья ваньзэ судить каре, соку
та дунне вылысь улон нунальёстэс Солэсь кыш-
каса ортчытэ. ¹⁸Тй тодйськоды, атайёсты бордысь
потэм алекъяськыса улонлэсь сисьмись азвесен
яке зарниен тй мозмытэмын өвёл шуыса, – ¹⁹тй
мозмытэмын чик шектэм-сьöлыктэм, дун-чылкыт

ыжпилэн кадь, Христослэн дуно Вирыныз. ²⁰Со дунне кылдытонлэсь азьвыл ик дасямын вал ни, нош лыктйз тй понна берпум дырьёсы. ²¹Со пыр Инмарлы оскыны кутскиды, Кудйз Сое кулэмысь улзытыса султытйз но Солы пиштйсь данлык сётйз. Соин ик тйляд осконды но, оскиськонды но Инмар дорын мед луоз.

²²Дух пыр зэмлыклы тэрытскыса, ымныр шоры учкытэк агай-вынлыко яратон понна асьтэлэсь лулдэс чылкытатэ, котьку но огдэс огды чылкыт сюлэмен яратэлэ. ²³Сисьмись кидыслэсь өвёл, сисьмисьтэмлэсь, улэп но пумтэм даурьёс улйсь Инмар кыл бордысь выльысь вордскемьёс тй луиды. ²⁴Уго

котькудйз но лулмугор – турын кадь,
адямилэн данэз но – турын пöлысь сяська кадь:
турын куасьмиз но, солэн сяськаез усьылйз;

²⁵нош Кузё-Инмарлэн кылыз

пумтэм даурьёс улэ.*

Та самой со кыл, кудйз тйледлы Зеч Ивор пыр тодытйське:

2-тй ЛЮКЕТ

¹Озы, котькыче уродлыкез, котькыче кескич ужез, чеберьяськонэз, вожьяськонэз но котькыче урод кылын вераськонэз палэнтэ, ²Али вордскем вож нуныос кадь яратэлэ дун-чылкыт кыл йöлэз,

* 1:24-25 Ис. 40:6-8.

со бордысен тй мед будоды но утиськон мед шедь-тоды шуыса. ³Уго тй оскалтйды ини Кузё-Инмар зечлыко шуыса. ⁴Со доры, улэп из доры, адямиосын кулэтэм карем, нош Инмарен быръем, дуно-лыклен матаз мыныса, ⁵асьтэос но, улэп изьёс луыса, асьтэдыз духовной корка пуктыны сётэ, дун-шектэм священство луэ, Иисус Христос пыр Инмарлы ярамонэсь духовной курбоньёс сётон понна. ⁶Священной Гожтэмын верамын уго:

”Тани, Мон Сйонэ иньетлы йыр из понйско, быръемзэ, дунозэ;

Солы оскись мурт возьытэ уз усы”.*

⁷Тйледлы, оскисьёслы, данлык, нош оскисьтэмьёс понна –

”из, кудзэ корка пуктйсьёс кулэтэм каризы, но кудйз сэреглы иньет йыр луиз, канжаськон излы, чөмтйськон излы пөрмиз”.*

⁸Инмар кыллы тэрытскытэк ульсьёс со борды канжаськыло. Сыче уго соослен адзонзы.

⁹Нош тй – быръем выжы, Эксэйлэн священникъёсыз, дун-сьöлыктэм калык, Инмарлэн люкетэз. Тйледыз Со пеймыт азысь Аслаз паймымон югыт улаз поттйз Öтисьлэн зечлыкъёсыз сярысь ивортыны. ¹⁰Куке но тй калыктэмлэсь гинэ калык вал, нош али – Инмарлэн калыкез луиды. Куке но тй Инмарлэсь гажан-жалянзэ тодытэк ульды, нош али сое ас вылады шөдйды ни.

* 2:6 Ис. 28:16.

* 2:7 Пс. 117:22; Ис. 8:14.



¹¹Гажаноосы! Тйледыз, та дуннелы мурт адями луйсьёсты, пидйылчиосты, курисько: лул вылэ урдскыльсь лулмугорлэн юрзым куронъёсызлэсь палэнскылэ. ¹²Тйляд улонды язычникъёс азын зечобуро мед луоз. Соос тйледды, йыруж лэсьтйсьёсты музэн, урод кыльёсын вераллязы. Тйлесьтыд зеч ужъёстэс адзыса, Инмарез данъяны мед быгатысалзы Солэн лыктон нуналаз.

¹³Кузё-Инмар понна, адямиослэн пунктэм котькудйзлы кузёзылы тэрытскыса улэлэ: эксэйлы-а – выльй кивалтонэз ки улаз возисьлы, ¹⁴кивалтйсьёслы-а – кудъёсыз йыруж лэсьтйсьёсты вось карыны ысто, нош зеч уж лэсьтйсьёслы – кузьымъёс-медъёс сёто. ¹⁵Уго Инмарлэн таё эрикез: асьмеос зеч ужъёс лэсьтыса визьзэс ыштэм адямиослэсь валатэк вераськонзылэсь ымзэс ворсаны мед быгатомы. ¹⁶Эриклэн нимыныз уродэз ватйсь адямиос кадь өвёл, эрикын улйсь муртъёс выллем, Инмарлэн ляльчиосыз кадь лэсьтэ. ¹⁷Котькинэ санэ понэ, куспады тупаса улонэз яратэ, Инмарлэсь кышкалэ, эксэез сйё-сано каре.

¹⁸Медоос, кышкаса кузёостылы тэрытске, – лякыт, зйбыт-востэмъёсызлы гинэ өвёл, лякыттэмъёсызлы-лекъёсызлы но. ¹⁹Инмарлы со ярамон: кин Инмар сярысь малпаса, курадзонэз, куректонкайгуэз чида – сое шонертэм ке но вось каро. ²⁰Урод ужъёсты понна жугемез чидаськоды ке, со понна кыёе ушъян тйледлы луоз? Нош зеч уж лэсьтыса вылысь курадзоно луйськоды, но сое чидаськоды ке, со Инмарлы ярамон. ²¹Уго тй со понна өтемын. Христос но асьме понна курадзон

чидаз, Солэн пыты куяз мед мыномы шуыса,
асъмелы адзем карон кельтйз:

²²Со ноқыче но сьӧлык ӧз лэсьты,

Солэн кылаз-ымаз

чеберьяськонэз-ӧрекчаськонэз ӧй вал”.*

²³Сое урод кылын тышкаськызы, нош Со пумитазы
урод кыльӧс ӧз вера. Курадзытыкузы но пунэмзэ
берыктонэн ӧз кышкаты, – ваньзэ шонер Судить
Карисьлэн кияз сётйз. ²⁴Асьмелэсь сьӧлыкӧсмес
Со Ачиз Аслаз Мугорыныз кирос вылэ нуиз: сьӧ-
лыкӧс понна кулэмын мед луомы, нош шонерлык
понна мед уломы шуыса. Солэн ярасыныз тй
бурмытскиды. ²⁵Тй уго возмаськисьтэк кылыса
йыромем ыжӧс кадесь вал, нош табере лулдэс
Возмась, Чаклась доры берытскиды.

3-тй ЛЮКЕТ

¹Озы ик тй но, кышномуртӧс, асьтэлэн куз-
пальӧстылы тэрытскыса улэ. Инмар кыллы тэ-
рытскытэк улйсь воргоронӧс кышнооссылэсь
улонзэс адзыса, кыльӧсын индылытэк, Инмар
пала берытскозы, ²адзызы ке тйлесьтыд чылкыт,
Инмарлэсь кышкаса улондэс. ³Тйляд чеберьясь-
конды вылласянь медаз луы – йырси пунон, зар-
ни арбериосты ошылонӧс, кильтрес дйськут.
⁴Адямилэн сюлэм пушказ бырытэк мед улоз зй-
быт, востэм дух: тйни мар дуно Инмар азын.

* 2:22 Ис. 53:9.

⁵Кукe нo озьы ик Инмарлы оскиськыса, вöсьяськыса улйсь кышномуртъёс нo, кузпальёссылэсь кылзйськыса, асьсэды чебертылйзы, ⁶кызыы Сарра, Авраамлы тэрытскыса, сое ”кузёе” шуылйз. Зеч уж лэсьтйськоды нo номырлэсь нo уд ке кышкаське, – тй солэн нылпиосыз луиськоды.

⁷Вöсьяськемды иназ мед мыноз шуиськоды ке, тй нo, воргоронъёс, кышноосыныды асьтэдыз визьмо возе – кынартэм сосудэн кадь. Тйледын ёош соос нo дэлето улон басьтоно муртъёс бере, соосты санэ понэ.

⁸Озьыен, ваньды тй одйг малпанэн, гажасажалыса, ог-огдэс яратыса, лякыт сямо луыса, зйбыт-востэм визьмын улэлэ. ⁹Уродлы пумит уродэн яке керетонлы пумит керетыса пунэмзэ эн берыктэ. Нош тй, эшшо ке, бакель каре, тодэ: со понна уго тй öтемын, – бакель каронэз басьтыны.

¹⁰Уго, кин улонэз яратэ нo зеч нунальёсты адземез ке потэ, кылзэ уродлэсь мед кутоз, ымзэ – кескич вераськонъёслэсь мед утёз.

¹¹Уродлэсь мед палэнскоз нo зеч уж мед лэсьтоз; тупаса улонэз мед утчалоз нo со пала кариськыны мед тыршоз.

¹²Уго Кузё-Инмарлэн синмыз шонер улйсьёс пала берытскемын; Солэн пельыз – вöсьяськемзы палан, нош Кузё-Инмарлэн ымнырыз урод лэсьтйсьёслы пумит берытскемын (соосты музьем вылысь быдтон понна).*

* 3:10-12 Пс. 33:13-17.

¹³Зеч лэсьтыны тыршисьёс ке тй луиды, кин тй-ледлы уродзэ лэсьтоз? ¹⁴Шонерлык понна курадзэно луиды ке но, тй шудоесь. Соослэн кышкатынзылэсь эн курдалэ, кер но эн потэ. ¹⁵Асьтэлэн сюлмады Инмарез Кузё-Инмарез сйё-дано возе. Оскиськонды пумысен котькудйзлы кылдэс юасьлы востэмен, гажась мылкыдын ответ сётыны котьку но дась луэ. ¹⁶Сюлэмды чылкыт мед луоз: тйледыз, йыруж лэсьтйсьёсты кадь урод кыльёсын верамзы понна, Христос бордын чылкыт улэмдэс сантэмасьёс возытэ вуттэмын мед луозы шуыса. ¹⁷Уго, Инмарлэн эрикезлы ярамон ке, урод ужъёс лэсьтыса курадзон сярысь, зеч ужъёс понна эсь-маса мед курадзод. ¹⁸Уго асьмеды Инмар доры ваён понна, асьмелэн сьöлыкъёсмы понна, Христос но одйг пол курадзон адзиз. Сьöлыкоос понна Шонер Улйсь мугорыныз виемын, нош духеныз улзйтэмын вал. ¹⁹Со духеныз лэзиськыса пытсэтэ ворсам духъёслы тодытйз, – ²⁰соослы, кудъёсыз кукке но соосты возьмась Инмарлэн кема чиданзлы тэрытскисьтэмесь вал. Ной улон нунальёсы, ковчег пыж лэсьтон вакытэ, тямьс лул гинэ ву пыр утиськыны быгатйзы. ²¹Нош со ву али но асьмеды уте, пылатонлы со укша. Пылатон – мугорлэсь кырсьсэ миськон понна öвöл, со Инмарлы чылкыт сюлмаын улыны сйзиськон. Со Иисус Христослэн улзыса султонэз пыр асьмелы утиськон сётэ, ²²Кудйз Инме жутйськыса Инмарлэн бур палаз улэ. Солы кылчинъёс, властьёс но кужымъёс тэрытскыса йыбырттйзы.

4-тй ЛЮКЕТ

¹Озьиен, асьме понна Христос лулмугорыныз курадзон чидано луиз, нош тй сое тодады вайыса лулдэс-сюлэмдэс юнматэ. Уго мугорыныз курадзись мурт съолькамысь дугдэ. ²Кылемзэ улондэс лулмугорлэн куронъёсызлы тэрытскыса өвёл, Инмарлэн эрикезлы тэрытскыса мед улоды. ³Тырмоз ни, уго ортчемзэ улондэс язычникъёслэн улоннызы уйдды: юрзым, кырсь ужъёслы, куронъёслы сётйськыса, (пиосмуртлы пиосмуртэн көлан, пудо вылэ тубан, кырсь малпанъёс), вина юыса, трос сиыса но юыса, сульдэръёслы йыбыртъяса. ⁴Соин ик язычникъёс паймо но уго: со юрзым ужъёсы соосын чош тй уд ни пыриськиське, но со понна соос тй сярись урод кыльёс вёлдо. ⁵Улэпъёсты но, кулэмъёсты но жоген Судить Карись азын соос кыл кутозы. ⁶Уго соин ик кинъёс али кулэмын ни, соослы но Зеч Ивор тодытэмын вал: адыми кадь мугорын судэ пырыса, духен Инмар бордын мед улозы шуыса.

⁷Котьмарлы но пум вуэ ини. Соин ик сэзь визьмын, вёсяськыса улэ. ⁸Нош уката ик огдэс огды сюлмысь яратыса улэ, малы ке шуоно, яратон трос съолькыёсты шобыртэ. ⁹Тй доры пырисьёс луизы ке, зургетыса эн улэ, сюдэ-вордэ соосты. ¹⁰Огдылы огды юрттйське, котькудйз сыче кузьи мен, кычезэ со басьтйз Инмарлэсь пёртэм пумо дэлетъёссэ басьтйсь коркаен зеч кивалтйсь ляльчи кадь. ¹¹Вераськод ке, Инмарлэсь кылзэ кадь шонер вера; ужаськод-тыршиськод ке, ужа-тыршы сыче



кужымен, кудзэ тыныд Инмар сётэ. Котькытын но Иисус Христос пыр Инмар данъямын мед луоз, Солы пумтэм вапумъёсы дан но кужым. Аминь.

¹²Гажано агай-выньёсы! Тй пöлы ыстэм тыллы эн пайме, тйледыз эскерон-чаклан понна со ыстэмын шуыса, – со тйледлы абдрамон учыр кадь медаз пот. ¹³Нош тй, Христослэн курадзöньёсаз пыриськиськоды шуыса шумпотэлэ, Солэн пиштйсь данлыкез усътйськыку но шумпотоно, шулдырьяськоно мед луоды. ¹⁴Христослэн адямиосыз луэмды понна тй сярысь урод кыльёс верало ке, тй шудоесь. Уго данлэн Духез, Инмарлэн Духез тй вылын улэ. Соос Сое сантэмало, нош тй – данъяськоды. ¹⁵Тй пöлысь нокин но адями виисьёсын, яке лушкаськисьёсын, яке йыруж лэсьтисьёсын, яке муртлэн ужаз пыриськисьёсын ог радэ курадзöнэ медаз сюри. ¹⁶Нош тон Христослэн муртэз луэм понна курадзид ке, соку эн воздаськы, таёе адзöнэд понна Инмарез данъя. ¹⁷Уго дыр вуиз судлы Инмар корка бордысен кутскыны. Нырысь ик асьме бордысен кутскиз ке, нош Инмарлэн Зеч Иворезлы пумитьяськисьёслы кыёе пум луоз? ¹⁸Шонер улйсь мырдэм утиськиз ке, нош сьöлыклэсь кышкасьтэмлы, сьöлыко муртлы мар луоз? ¹⁹Соин ик, кинёс Инмарлэн эрикезъя курадзöн чидало, зеч уж лэсьтэмысь медаз дугдэ, соос оскиськымон Кылдытйсьлэн ки улаз асьсэлэсь лулзэс мед сётозы.

5-тй ЛЮКЕТ

¹Тйлесьтыд возьмасьёстэс* курисько, – мон но соос кадь ик возьмась, Христослэсь курадзоньёссэ адзись, вуоно усътйськоно данлыке пыриськись. ²Тйледлы оскыса сётэм Инмарлэсь уллёзэ тыршыса, нокин косытэк-ёртытэк, сюлэмдэс-мылкыддэс поныса, кызы кулэ Инмарлы, озьы чаклалэуте сое. Отысь асьтэлы возьыттэмлыко пайда эн утчалэ. ³Инмарлэн тй ки улэ сётэм муртъёсызлы кужымдэс эн возьматэ, уллёлы адзем карымонэсь луэ, – ⁴возьмасьёслэн Кузёйырзы лыктйз ке, данлэсь шуясьтэм-бырисьтэм венецэ тй басьтоды. ⁵Тй но, покчиос, вöсяськисьёслэн кивалтйсьёссылы тэрытске, ваньды ог-огдылы тэрытскыса, востэм-зйбыт улэ, малы ке шуоно,

”вылй мылкыдоослы Инмар пумит кариське, нош востэмъёслы – дэлет сётэ”.*

⁶Соин ик Инмарлэн кужмо ки улаз востэм кариське, дыр вуиз ке, Со тйледыз мед жутоз шуыса. ⁷Вань сюлмаськоньёстэс Со доры вае, уго Со тй сярысь сюлмаське. ⁸Сазь улэ, сэзь кариське, малы ке шуоно, тйляд тушмонды – дьявол, бурсйсь лев кадь, кинэ ке но ньылыны утчаса ветлэ. ⁹Солы пумит кужмо осконэн сылэ. Тодэ: дунне вылын таёе ик курадзоньёс тйляд агай-выньёсты но чидано луо шуыса. ¹⁰Котькыёе но дэлет сётйсь Инмар, Иисус Христос бордысь Аслаз пумтэм

* 5:1 Пастырь; пресвитер.

* 5:5 Притч. 3:34.

вапумысь данлыказ асьмеды өтись, тйляд вакчияк курадзонды бере тйледыз юнматоз, кужмоятоз, чигиськисьтэм-куасаськисьтэм кароз. ¹¹Пумтэм вапумьёслы Солы дан но кужым. Аминь.

¹²Тае мон тйледлы Силуан пыр вакчияк гожтй, малпасько, со оскиськымон братты луэ шуыса. Инмарлэн та зэмос зечлыкез-дэлетэз луэ шуыса тйлесьтыд мылкыддэс лөпкытыны но со сярысь тйледлы ивортыны мылкыд кари. Та бордын тй юн сылэ, юн возиське.

¹³Тйледыз зечкылало Вавилонысь тй кадь ик бырьем Инмарлы оскисьёс но Марк, мынам пие.

¹⁴Яратонэн чупаса огдэс огды зечкылалэ. Иисус Христос бордын улйсьёс, ваньдылы тйледлы каньыллык сйзисько. Аминь.

